

Wasika-à Bulus Ba Ya Sig Mpìrká Mà TASALONIKA Wà Wa Pyànà

Mpìrká mà Tasalonika kyinnbá shi rìghing shan shan nímá á shinn wà barà àyúnn-à Yesu Kristi má kàng bi á dunyaru. Mpìrká káhi dang rag Kristi kàng bi rìghing. Bulus ba ya big wasika wà wa pyànà jirà aku tàg big jír á shinn barà Yesu Kristi má kàng bi. Ku dinya big rag sai-à Yesu Kristi ma nyàan kàng bi, mpìrká má sa swàb kà bu-à bibai kim kim. Ku dinya big abig sa swàm Yesu Kristi ma abig shi shu sisàn.

¹ I mì Bulus ma Silas ma Timoti ri ba ya ning, ning mpìrká á Tasalonika, ká zyun-à ri kwonn shinn á zìnn Shìdun Tayí ma Shinn Luyí Yesu Kristi.

² Shìdun Tayí ma Shinn Luyí Yesu Kristi abig sa sà n ya ning, ma abig ya ning pìkyinn na tag.

Sai-à Kristi Ma Bi Hing, Shìdun Má Wà Kwonn

³ Wunzà yí big, sà n hing ayi sa ya Shìdun ísoko, jir kai bàna ning ri bir swàb kà pìkyinn ná á byar Yesu, mi ri zì m swàb kà ba dirná wàni.

⁴ Wà ní ng í bu-à sa yi ri swam yan ning á sai-à ya kwonn shi sig ma mpìrká ri bàg Shìdun. Yi ri dinya big rag, hár tà m-à ní ng í barà ning wim pìkyinn, n bir sig pìkyinn ná á byar Yesu, kó barà mpìrká ri ya ning shwìn ní ng.

⁵ Pìkyinn birná zyun-à ning shi sig ma kàhi á sai-à ning ri wa shwìn níng, tág hing yi rag sai-à Shìdun má wà kwonnwá níng, kwá ya ning bu-à ning kinn sig wà aning dìg. Ning kinn hing wà aning kà mà byar-à ku na sig kùrwá, jir kai bàna shwìn-à ning ri wa ning, ning ri wa jirà aning dìg byar-à níng hi.

⁶ Shìdun má wà kwonnwá á gbìb gwangga. Kwá ya pyann kàng mpìrká ri ya ning shwìn níng shwìn tinn.

⁷ Ning ká ning ri wa shwìn tàma-à níng, kwá ya ning byar shu òsàn byar-à ná shi ngàng ma yi í byar nzyun, á sai-à Shinn Luyí Yesu ma wann bi hing mà wai, àràng í anam pyir, kwonn ma yann aswamká buwá.

⁸ Ayúnn-à níng hi, kwá ya mpìrká ngàng sig jir Shìdun níng shwìn, àràng ká zìg fig jir àjwár-à big dinya sig big á shinnwá ni bàna níng.

⁹ Mpìr káníng má wa shwìn-à má vinn fig á vinn bàna. Bá jànn rìg hár kinn kinn. Byar shubá má nonn ma Shinn Luyí. Bá myàng fig gbam Shìdun bàna.

¹⁰ Bu-à níng má sa àyúnn-à Shinn Luyí má kàng bi áni. Kwá kàng bi àyúnn-à níng hi, jirà mpìrká buwá abig swam yan ku á jir shinn bu-à ku sa ya sig mpìrká buwá big. Mpìrká ká bir sig pìkyinn á byarwá ni níng, bá wib ku. Ná shi áyaubá ni, jir kai bàna ning bir sig pìkyinn ná á jír-à yi dinya sig ning níng.

¹¹ Wàníng í bu-à sa yi ri vig Shìdun Tayí á jir shinn ná ni. Yi ri vig ku, aku sa ma aning shi íri mpìrká ku ri zìm, aning shi àràng barà ku bar bi sig ning aning shi mpìrká buwá níng. Yi ri

vig ku aku ya ning gbamwá jirà aning shi dikina mpìr òsàn ma aning sa kyann bu òsàn kó ákaun àràg barà ning ri zìm aning sa níng. Shìdun aku sa aning sa swàm zyun-à ning ri zìm aning sa jir pìkyinn bir-à ning bir sig á byar Yesu.

¹² Na sa hing àdòníng, mpìrká má swam yan Shinn Luyí Yesu dò jir shinn ná. Bá wib ning dò jir shinnwá jir kai bàna Shìdun Tayí ma Shinn Luyí Yesu Kristi sa sà̀n ya rìghing ning.

2

Mpìr Bibai Má Zu Bi

¹ Wunzámí big, má dinya ning jír á shinn àyúnn-à Shinn Luyí Yesu Kristi má kàng bi áni. Ayúnn-à níng hi, yi bidim pár yá kwonn shi á pyànnwá ni. Mì ri vig ning,

² kada aning kyab jír shan shan á pìkyinn ná ni bàna, kada aning shà̀r zinn jirà mpìrká ri dang rag àyúnn-à Shinn Luyí má kàng bi áni níng, fòr rìghing níng bàna. Yi yì hing mpìrká káhi má dinya ning rag, í Awun Kyìkyà̀r tuya síg big nì, kó yi dang síg nì, kó yi ba sig á tarkada. Kada aning bir pìkyinn ná áni bàna.

³ Kada aning zìm mpìr zyun aku tonn gban ning bàna sám. Mì ri dang fig jír bu jonn bàna. Shinn Luyí má kàng bi fig ma bàna, sai àyúnn-à mpìrká nìnnàn nímá ma ri sa Shìdun yawari. Ayúnn-à níng hi, Mpìr Bibai má zu bi, zyun-à bá takà mà lu pyìr-à nì.

⁴ Mpìr Bibai-à níng má zib jir Shìdun ma kó kai bidim pár zyun-à mpìrká ri binn kir wann á pyànnbá ni. Kwá kan dim mpìrká kada abig

vig Shìdun bàna. Kwá kà mà lu Shìdun má shi wann àràg í kùr. Hár kwá dang rag ku shi síg nì Shìdun.

⁵ Sai-à n rì shi sig á byarná ni, n rii dinya kyann ning jír-à níng. Ning kyab pànn fig bàna rà?

⁶ Tàma-à níng, ning yì hing bu zyun-à shi sig áni wà ri kan òm Mpir Bibai-à níng barà kwá tàg shinnwá. Wà àyúnn-à ma màg hing, í wà kwá zu bi má tàg shinnwá.

⁷ Hár tàma-à níng mpìrká nìnànn nímá ri sa bu pyìr, mi ri sa yipyàr ma jir Shìdun. Big ri sa àdòníng, jir kai bàna Mpir Bibai zyun shi sig áni, zyun-à ri bònn tàg big abig sa àdòníng. Mpir Bibai-à níng má zu bi fig ma bàna, sái wà Shìdun ma zìg zu rìghing mpìr-à ri kan òm ku aku zu bi bàna níng.

⁸ A byar-à níng hi, Mpir Bibai-à níng má tàg rag shinnwá. Ama sai-à Shinn Luyí Yesu ma bi hing ma gban, mpìr-à níng má òg fig gban-à kwá sar á pyànnwá ni bàna. Shinn Luyí Yesu má gban rìg ku ma nu jír átai.

⁹ Sai-à Mpir Bibai-à níng má zu bi jag, kwá bi kwonn ma gban Shaitan ùwài nímá, jirà aku tonn gban mpìrká. Kwá sa buká zyun-à má ya mpìrká zinn hár bá sar má ngan finn íri nu átai.

¹⁰ Kwá sa gban rìg bu bibaiká bidim pár, jirà aku tonn gban mpìrká ká nang jànn sig. Kwá tonn gban big, jir kai bàna big ngàng wà abig bàg gbìb àjai, jirà abig wim zu.

¹¹ Barà big ngàng sig jir àjai-à níng, Shìdun má sinn kà big abig kyab íri bu-à bàna ma yìr, jirà abig bir pìkyinnbá á jir òsàngká ni.

¹² Shìdun sa sig àdòníng jirà kwonn-à kwá wà níng, aku pànn mpìrká ká ngàng sig jír àjai, mi ri fig kab àjwár bu-à bibai.

Aning Sar Gbam

¹³ Wunzámí big, sànn hing ayi sa ya Shìdun ísoko, yiká Shinn Luyí Yesu ri zìm yi níng. Ayi sa Shìdun ísoko jir kai bàna Shìdun shig zu sig ning á sai-à ku mànn fig ma dunyaru bàna. Ku shig zu ning jirà aku pinn zu ning. Ku pinn zu sig ning á sai-à ku sinn kà sig ning áyau mpìrká buwá ni ma gbam Awun Kyìkyàr. Ku sa sig àdòníng jir kai bàna ning bir sig pìkyinn ná á jir àjai.

¹⁴ Ku bar bi sig ning, aning shi mpìrká buwá á sai-à ning fig sig jir àjwár-à yi dinya sig ning níng. Ku bar bi sig ning jirà aning òg awài àràg barà Shinn Luyí Yesu Kristi shi sig mpìr ùwài níng.

¹⁵ Wunzámí big, á jir shinn wànníng ni, aning sar gbam òsàn nímá á jir Yesu, ma aning bir pìkyinn ná á jìrká big tàg sig yi, ká zyun-à yi tàg sig ning níng, ká yi dang sig ma nu, ma ká yi ba sig á tarkada, kada aning fim bàna aning bir pìkyinn ná áni.

¹⁶ Mì ri vig Shinn Luyí Yesu Kristi ma shinnwá, ma Shìdun Tayí zyun-à zìm sig yi, n sa ya sig yi bu òsàn, n ya sig yi pìkyinn wim hár kinn kinn, n sa sig yi sinn sig zuyí á bu òsàn-à ku dang sig rag kwá ya yi níng,

¹⁷ abig ya ning pìkyinn wim, jirà aning òg gbam ma aning sa bu òsàn kwonn ma jír-à òsàn dang.

Bulus Rag Abig Vig Ya Ku Shìdun

3

¹ Wunzàyí big, aning vig ya yi Shìdun jirà mpìrká kó áni bidim pár abig fig jír á shinn Shinn Luyí Yesu ni òsàn nímá, jirà abig bir pìkyinnbá, ma abig wib àràg barà ning ri sa níng.

² Aning vig ku jirà aku kang yi á byar mpìr bibaiká, jir kai bàna ning yì hing mpìrká nìnànn nímá zìg fig jir Shìdun bàna.

³ Shinn Luyí Yesu ri sa ya mpìr bu-à kwa gib sig nu rag kwá sa. Kwá gbar gbam ning òr, má kang ning jirà Shaitan aku sa ning bu-à bibai bàna.

⁴ Shinn Luyí sa sig yi, yi bir sig pìkyinnyí á byarná ni. Yi yì hing rag ning ri wib jírka yi rì dinya sig ning níng. Yi yì hing rag ná shi má wib kyann jír káníng hi.

⁵ Shinn Luyí Yesu Kristi aku sa aning yì rag Shìdun ri zìm ning wàni. Aku sa aning ba kyinn àràg barà Kristi ma shinnwá ba sig kyinn níng.

Sàn Sig Kó Ni Aku Sa Swàm

⁶ Wunzàyí big, yi ri vig ning á zìnn Shinn Luyí Yesu Kristi, aning gàb òr ma mpìrká zyun-à ri bàg Yesu, ama big ri shi shu àbìnn, mi ri bàg fig buká yi tàg sig ning bàna níng.

⁷ Ning yì hing sai-à yi ma ning rì shi kwonn sig í zyun níng, yi rì sa fig òr jar bàna. Ning má, aning sa swàm ma ghamná tìnn.

⁸ Yi ri bir fig pìkyinnyí á òr mpìr jirà aku ya yi bu-à yá ji ji bàna. Yi ri sa swàm fi ma àyúnn, jirà ayi òg bu-à yá ji, jir kai bàna yi zìm fig ayi ya ning shwìn wà ná ya kyann yi buju bàna.

⁹ Yi shi sig ma gbam-à yá dang rag aning ya yi buju. Ama yi sa sig swàm, jirà ning má, aning shwann barà ná sa swàm tinn.

¹⁰ Sai-à yi rì shi sig mà byarná ni, yi rì dang sig jír-à níng kàun nìnànn nímá n rag, mpìr-à ma zìm fig swàm bàna, kada abig ya ku buju bàna.

¹¹ Yi dang sig jír-à níng, jir kai bàna yi fig sig rag mpìrká káhi áyauná ni ri zìm fig swàm sa bàna. Bu-à big sìn sig á pìkyinnbá ni bàna, big ri kà kyann áyau jír-à má zu fig gbìbbá bàna.

¹² Yi ri dinya írì swai mpìrká níng, á zìnn Shinn Luyí Yesu Kristi, abig pànn shinnbá, ma abig sa swàm jirà abig díg bu-à bá ji.

¹³ Ama bigná wunzámí big, kada aning nì bàna, aning shi sa ya mpìrká bu òsàn.

¹⁴ Wà mpìr zyun áyauná ni ma wib fig bu-à yi ba sig á tarkada-à níng ni bàna, aning myàng gbam ku ma yìzu, ma aning zu rìg áyauwá ni jirà aku yì rag bu-à ku sa sig níng, sànn fig bàna.

¹⁵ Kada aning sìn kàng ku àràg í mpìr azíbná bàna. Ama aning gbar sungwá, jir kai bàna ku í wunzàná.

Jir Bulus Wà Kinn Shinn

¹⁶ Yi ri vig Shinn Luyí ma shinnwá zyun-à ri sa tag pìkyinn mpìrká níng, aku ya ning pìkyinn na tag kó ákaun bidim pár, áyau shuná ná shi. Aku shi kwonn ma ning.

¹⁷ Mì Bulus, mì ri ba ya ning wasika-à níng ma vùmí, mi ri bib kà ning. N sìn kà sig zìnnmí áyau wasika-à hi ni, jirà aning yì í mì bà síg nì.

¹⁸ Asàn Shinn Luyí Yesu Kristi aku shi kwonn ma ning bidim pár.

Jibu
Jibu: Jir Shidun (New Testament)

copyright © 2019 Wycliffe Bible Translators, Inc.

Language: Jibu

Contributor: The Nigeria Bible Translation Trust

All rights reserved.

2025-05-06

PDF generated using Haiola and XeLaTeX on 5 May 2025 from source files
dated 6 May 2025

a1139895-fa13-5ff1-8c00-a8ad25fcfa2f